

## Morning Regional Dogri News Bulletin, 27 December 2024

मार्निंग डोगरी न्यूज बुलेटिन, समें. 09.20 Hrs

<><><><><><>

### Headlines

- साबका प्रधानमंत्री डॉ. मनमोहन सिंह हुंदा काल होई गेआ ऐ। राष्ट्रपति, उपराष्ट्रपति, प्रधानमंत्री, उपराज्यपाल, मुखमंत्री ते होरनें नेताएं डॉ. मनमोहन सिंह हुंदा काल होई जाने पर दुख ते बसोस जाहिर कीता ऐ।
- प्रधानमंत्री नरेंद्र मोदी होरें आखेआ जे युवाएं दा सशक्तिकरण सरकार दी नीति दा प्रमुख केंद्र ऐ।
- साम्बा दे रिषीक कुमार होरें गी साइबर सुरक्षा सरबंधी नमिएं काहडें लेई प्रधानमंत्री राष्ट्रीय बाल पुरस्कार कन्नै सम्मानित कीता गेआ। उपराज्यपाल ते केंद्री विज्ञान ते टेक्नालाजी मंत्री होरें रिषीक कुमार दी सराहना कीती।
- उपराज्यपाल मनोज सिन्हा होरें शांति ते भाईचारे गी अपनाने पर जोर पाया। उनें मुखे दी एकता गी मजबूत करने च युवाएं दी भूमिका गी उजागर कीता।
- मुखमंत्री उमर अब्दुल्ला होरें बाग-ए-बाहु च Open Air Amphitheater दी शुरूआत कीती। इसदा मकसद राष्ट्रीय सैलसफा आहले नक्शे पर जम्मू गी बढावा देना ऐ।

<><><><><><>

## Condolence-Message

साबका प्रधानमंत्री डॉ. मनमोजन सिंह हुंदा पिछली रातीं नमीं दिल्ली च काल होई गोआ। ओह 92 बरें दे हे। डॉ. सिंह होरें अखीरी साह दिल्ली दे एम्स अस्पताल च लैता। कल मते बिमार होने करी उनेंगी रातीं 8 बजे एम्स दे एमरजेंसी वार्ड च भर्ती करवाया गोआ हा। एम्स पासेआ जारी बुलेटिन मूजब सारी कोशिशें दे बावजूद उंदी हालत च सुधार नेई होआ ते 9 बज्जिये 51 मिंटे पर उंदी मौत दी पुष्टि करी दिती गई। डॉ. मनमोहन सिंह होरें गी 1991 च शुरू होए दे आर्थिक सुधारें लेई बी जानेआ जंदा हा। पिछले किश म्हीनें थमां मनमोहन सिंह हुंदी सेहत खराब चलारदी ही। राष्ट्रपति द्रौपदी मुर्मू, उपराष्ट्रपति जगदीप धनखड़ ते प्रधानमंत्री नरेंद्र मोदी होरें साबका प्रधानमंत्री डॉ. मनमोहन सिंह हुंदे काल पर दुख जताया ऐ। कांग्रेस अध्यक्ष मल्लिकार्जुन खड़गे ते होरनें लोके बी डॉ. सिंह हुंदा काल होई जाने पर अफसोस जाहिर कीता ऐ। उपराज्याल मनोज सिन्हा ते मुखमंत्री उमर अब्दुल्ला होरें बी डॉ. मनमोहन सिंह हुंदा काल होई जाने पर दुख ते बसोस प्रगट कीता ऐ।

<><><><><><>

## National Mourning

सरकार नै साबका प्रधानमंत्री डॉ. मनमोहन सिंह हुंदे काल मगरा उंदे सम्मान च 7 दिनें दे राजकीय शोक दी घोषणा कीती ऐ। डॉ. मनमोहन सिंह हुंदा खीरी संस्कार पूरे राजकीय सम्मान कन्ने कीता जाग।

इस दौरान मुख्य भ्रै च राश्ट्रीय झंडा अद्दा झुके दा रौहग ते कोई बी सरकारी कार्जक्रम आयोजित नेई होग। विदेशें च स्थित सारे भारतीय मिशनें ते दूतावासें च बी खीरी संस्कार आहले ध्याड़े राश्ट्रीय झंडा अद्दा झुके दा रौहग। साबका प्रधानमंत्री डॉ. मनमोहन सिंह होरें गी श्रद्धांजलि भेंट करने लेई अज्ज बड्डलै 11 बजे केंद्री मंत्रीमंडल दी बैठक होग।

<><><><><><>

PM-Veer Bal Diwas

प्रधानमंत्री नरेंद्र मोदी होरें आखेआ ऐ जे युवाएं गी सशक्त बनाना गै सरकार दी सब्बनें शा बड्डी नीति रौहग। कल नमीं दिल्ली च वीर बाल दिवस समारोह गी संबोधित करदे होई नरेंद्र मोदी होरें आखेआ जे युवा शक्ति करी गै सारी दुनिया भारत आहली भेठा आसैं-मेदें कन्ने दिक्खा'रदी ऐ। प्रधानमंत्री होरें आखेआ जे युवाशक्ति अज्ज स्टार्ट अप्स विज्ञान ते खेड्डें कोला लेइयै उद्यमशीलता च नमीं क्रांति दा संचार करा करदी ऐ। समारोह दौरान नरेंद्र मोदी होरें साहिबजादें दे बलिदान दा सम्मान कीता ते राश्ट्रीय एकता दे महत्व पर जोर पाया। प्रधानमंत्री होरें राजनीति च इक लक्ख युवाएं गी शामिल करने लेई इक योजना दी बी घोषणा कीती। इस योजना तैहत गैर राजनीतिक पविवारें दे युवाएं गी राजनीति च शामिल करने आस्तै प्रोत्साहित कीता जाग। प्रधानमंत्री होरें दस्सेआ जे विकसित भारत युवा नेता वार्तालाप दा आयोजन अगले बरे दी शुरुआत च स्वामी विवेकानन्द हुंदी जयंती पर कीता जाग।

<><><><><><>

## Risheek-Award

साम्बा दे रौहने आहले रिषीक कुमार होरें गी साइबर सुरक्षा बारें कीते गेदे उंदे कम्में लेई प्रधानमंत्री राष्ट्रीय बाल पुरस्कार कन्नै सम्मानित कीता गेआ ऐ। राष्ट्रपति द्रौपदी मुर्मू होरें रिषीक होरें गी एह पुरस्कार दिता। प्रधानमंत्री नरेंद्र मोदी होरें इस मौके पर रिषीक हुंदे कन्नै गल्लबात कीती।

तोआई, उपराज्यपाल मनोज सिन्हा होरें रिषीक हुंदी सिफत करदे होई आखेआ जे उंदी प्रतिभा ते नमियें काहडां कड्डने आहला जेड़ा उंदा हुनर ऐ, ओह होरनें युवाएं गी बी प्रेरित करोग। केंद्री मंत्री डॉ. जतिंद्र सिंह होरें बी रिषीक हुंदी सराहना कीती ते आखेआ जे उनें सरकारी नौकरी हासल करने आहली मानसिकता गी तोड़ने ते स्टार्ट अप उद्यमशीलता गी अपनाइयै इक्क मिसाल कायम कीती ऐ। आकाशवाणी कन्नै गल्ल करदे होई रिषीक नै आखेआ।

<><><><><><>

## Kishtwar-PSA

राश्ट्र विरोधी तत्वे खलाफ कार्रवाई तैहत किशतवाड़ जिला प्रशासन नै जफर हुसैन भदर गी जन सुरक्षा कन्नू यानि पी.एस.ए तैहत हिरासत च लैता गेआ ऐ। एह कार्रवाई गैर गतिविधिएं च शमूलियत ते ओवर ग्राउंड वर्कर्स दे तौर पर कम्म करने करी कीती गेई ऐ। उसी कठुआ दी जिला जेल च रक्खेआ गेआ ऐ। प्रशासन नेह तत्वे खिलाफ कार्रवाई करने ते शांति बहाली लेई बचनबद्ध ऐ।

लोकें गी बी अपील कीती गई ऐ जे ओह शांति ते आपसी भाईचारा बनाई रखने च अपना सहयोग देन ते कुसै बी चाली दी गैर कनूनी गतिविधि बारे किशतवाड़ पुलस दी हेल्पलाइन 99061-54100 पर राबता करन।

<><><><><><>

### LG-Celebration

उपराज्यपाल मनोज सिन्हा होरें सब्बनें गी अपील कीती ऐ जे ओह शांति ते भाईचारे आहले स्नेह गी अपनान। उनें एक्के गी होर बी मता मजबूत बनाने च युवाएं दी भूमिका गी उजागर कीता। उनें आखेआ जे मुख मकसद हर नागरिक दे अंदर प्यार ते दया दी भावना गी जागृत करना ऐ। एह गल्ल उपराज्यपाल होरें ऑफ जेएण्डके क्रिश्चियन सभा आसेआ आयोजित कार्यक्रम गी संबोधित करदे होई आखी। उनें सब्बनें गी अपील कीती जे ओह यीशू मसीह हुंदे आसेआ दिती गेदी सिक्खेआएं दा पालन करन। उनें मुख्य दी समृद्ध संस्कृति ते आपूं चै रली-मिलिए रौहने आहली विरासत गी बी उजागर कीता। उनें आखेआ।

उपराज्यपाल मनोज सिन्हा होरें इक होर कार्यक्रम च गुरु गोबिंद सिंह जी हुंदे साहिबजादे ते माता गुजरी जी गी बी श्रद्धांजलि भेंट कीती। इसदा सरिस्ता ऑल जम्मू-कश्मी सिख कोआर्डिनेशन कमेटी आसेआ वीर बाल दिवस दे सरबंधै च कीता गेआ।

उनें युवाएं गी अपील कीती जे ओह इतिहास थ्वां सिक्खन। साहिबजादे दे बलिदान गी चेता रक्खन ते गुरु गोबिंद सिंह जी हुंदी विरासत दा सम्मान करन। उनें आखेआ।

<><><><><><>

### CM-Bagh-e-Bahu

जम्मू दे सैलसफा गी बढ़ावा देने आस्तै मुखमंत्रि उमर अब्दुल्ला होरें कल बाग-ए-बाहु च Open Air Amphitheater ते Light and Sound शो दा उद्घाटन कीता। इस मौके पर बोलदे होई उमर अब्दुल्ला होरें आखेआ जे एह मौका जम्मू सूबे गी देशा दे सैलसफा आहले नक्शे पर उप्पर चुक्कने दी शुरुआत ऐ। मुखमंत्रि होरें मते सैलानियें गी आकर्षित करने लेई जोर पाया ते आखेआ जे श्री माता वैशणो देवी दे दर्शनें लेई सलाना आने आहले 1 करोड़ श्रद्धालुएं च जेकर 15 फीसद लोग बी जम्मू दी सैलसफा आहली थाहरें बक्खी जाना शुरु करी देन तां 15 लक्ख सैलानी हर बरे सैलसफा आस्तै औडन। उमर होरें बाग-ए-बाहु दा इक्क सांस्कृतिक केंद्र च बदलाव होने लेई तरीफ कीती। उमर अब्दुल्ला होरें आखेआ जे इस थाहरें दा इस्तेमाल स्कूली गतिविधियें, सांस्कृतिक कार्जक्रमें ते होरनें बक्ख-बक्ख आयोजनें आस्तै कीता जाना लोड़चदा ऐ तां जे एह इक्क जीवंत थाहर बनी सकै।

<><><><><><>

## Announcement

आकाशवाणी जम्मू दा प्रादेशिक समाचार एकांश कल 27 दिसंबर 2024 गी भारती संविधान गी अपनाए जाने दे 75एं बरें दी गौरवशाली जातरा पर 25एं मिंटे दा इक्क विशेष कार्यक्रम प्रसारित करोग। विशेष प्रसारण कल शुक्रवारें 27 दिसंबर गी बड्डलै साइडे 9 बजे कीता जाहग। इस कार्जक्रम दा उद्देश्य भारती संविधान ते स्हाड़े सब्बनें दे संवैधानिक अधिकारें बारै जागरूकता पैदा करना ऐ। 26 नवम्बर सन् 19 सौ नुंजा गी भारती संविधान गी अपनाया गेआ हा ते फही 26 जनवरी 1950 गी इसी लागू करी दिता गेआ हा। इस कार्जक्रम च स्हाड़े न्यूज़ एन्कर श्रुति खजूरिया ते कुनाल श्रीवत्स गल्लबात करै करदे न वरिष्ठ एडवोकेट शेख शकील हुंदे कन्नै। इयै ज्नेही होर दुई महत्वपूर्ण जानकारियें सरबंधी प्रसारण लेई एफ.एम 100 इशारिया 3 मैगाहर्टज़, 104 इशारिया 5 मैगाहर्टज़ ते मीडियम वेब 303 मीटर यानि 990 किलोहर्टज़ उप्पर आकाशवाणी समाचार ते कार्जक्रम सुनदे रवो ते [nujammu@gmail.com](mailto:nujammu@gmail.com) उप्पर स्हाड़े कन्नै इंदे बारै अपनी प्रतिक्रिया पक्क गै सांझी करो।

<><><><><><>